

## Dogri News Bulletin,

20 October 2024 18:15 Hrs

### Headlines

- प्रधानमंत्री नरेंद्र मोदी होरें मुलखै च पिछले 10एं बरें दौरान सेहत दिक्खभाल दे क्षेत्र च होए दे महत्वपूर्ण सुधार पर लो पाई।
- जम्मू-कश्मीर विधानसभा दे नमें चुने गेदे विधायकें दा शपथ ग्रैहण समारोह कल होग, प्रो-टेम स्पीकर मुबारक गुल होरें अज्ज विधान परिसर दा दौरा कीता, शपथ ग्रैहण समारोह गितै तयारिएं दा निरीक्षण कीता।
- मुखमंत्री उमर अब्दुल्ला होरें अज्ज श्रीनगर च 42 किलोमीटर लम्मी फुल्ल मैराथन द्रौड़ गी झंडी दस्सिए रवाना कीता। 21 किलोमीटर हॉफ द्रौड़ च आपूं बी हिस्सा लैता ते मेद कीती जे इस चाल्ली दे आयोजन हर साल कराए जाडन।
- उपराज्यपाल मनोज सिन्हा होरें आखेआ ऐ जे रिकार्ड गिनतरी च सैलानिएं दा इत्थे औना इस गल्लै दी तस्दीक ऐ जे जम्मू-कश्मीर च रमानदारी, तरक्की ते खुशहाली ऐ।

<><><><><><>

### PM-Varanasi

प्रधानमंत्री नरेंद्र मोदी होरें अज्ज पिछले 10 बरें दौरान देसै दे सेहत सेवा क्षेत्र च होए दे महत्वै आहले बदलाव पर जोर पाया। श्री मोदी होरें ना शडा पूर्वांचल सगुआं पूरे देसै च इक मुख सेहत सेवा केंद्र दे तौरा पर काशी दी बदा रदी साख गी उजागर कीता। ओहू अपने संसदीय हल्के वाराणसी च आर.जे शंकरा अक्खियें दे अस्पताल दा उद्घाटन करने परैंत बोला करदे हे। प्रधानमंत्री होरें घोषणा कीती जे सरकार देसै च सेहत ढांचे गी उबड़ा चुक्कने ताई अगले 5 बरें दौरान 75 ज्हार होर मैडिकल सीटें गी जोड़ंगन। उनें पिछले 10 बरें च पूर्वांचल इच 5500 शा

बहू आयुष्मान आरोग्य मंदरें दी स्थापना दा हवाला दित्ता जिने दोआइयें गी होर मता किफायती बनाई दित्ता जेदे कन्नै इंदे पर 25 फीसदी खर्च घट्ट होआ ऐ। अपनी सरकार दे सत्ता च औने मगरा उनें टीकाकरण दी खराब हालत गी सुधारदे होई मिशन इंद्रधनुष दी कामयाबी पर लौऽ पाई टकोहदा करियै कोविड-19 महामारी दौरान। तमिलनाडू दे कांची कामकोटि पीठम दे जगतगुरू श्री शंकर विजेयंद्र सरस्वती हुंदी मौजूदगी च अस्पताल दा उद्घाटन कीता। इस मौके बोलदे होई श्री मोदी होरें मेद जताई जे नमें अस्पताल कन्नै बच्चें ते बुजुर्गे दौनें गी लाह पुज्जोग।

<><><><><><>

### Prez. National Water Award

राश्ट्रपति द्रोपदी मुर्मू होर मंगलवार गी नमीं दिल्ली च पंजमें राश्ट्री जल पुरस्कार 2023 प्रदान करंगन। केंद्री जल शक्ति मंत्रालय नै 9 वर्गे च 38 विजेताएं दी घोषणा कीती ऐ जिंदे च बेहतरीन राज्य, बेहतरीन जिला, बेहतरीन ग्राम पंचैत, बेहतरीन शैहरी मकामी निकाय दे वर्ग शामिल ना। पुरस्कार जित्ते आहले हर विजेता गी 1 प्रशस्ति पत्र ते ट्राफी कन्नै नकद रकम बी प्रदान कीती जाग। मंत्रालय मुताबक सरकार जल प्रबंधन ते पानी दे बचा बारै जागरूकता लेयाने ताई राश्टो सतह पर इक्क व्यापक अभियान चला करदी ऐ। राश्ट्री जल पुरस्कारें आस्तै समूलचे देसै थमां नेय जने ते संगठनें गी चुनेआ जंदा ऐ जेडे सरकार दे पानी गी बचाने आहले लक्ष्यें गी हासल करने बक्खी कम्म ते कोश्टां करा'रदे ना।

<><><><><><>

### MLA-Oath

जम्मू कश्मीर विधानसभा दे नमें चुने गेदे विधायकें गी कल ईदगाह थमां विधायक मुबारक गुल, जिनें गी प्रोटेम स्पीकर यानि अस्थाई स्पीकर दे तौर पर नियुक्त कीता गेदा ऐ, होर औहद्वे दी सगंध चुकांगन। लेफ्टिनेंट गवर्नर

मनोज सिन्हा होरें 6 बारी विधायक रेई चुके दे मुबारक गुल होरें'गी प्रोटेम स्पीकर नियुक्त कीता हा ते गुल होर हून नमें चुने गेदे विधायकें गी सगंध चुकाडन। श्रीनगर च संगारें दपैह्नी 2 बजे विधानसभा परिसर च सगंध चुक्कने आला समारोह आयोजित कीता जाग। नमीं विधानसभा दे इजलास दे शुरू होने मगरा विधायकें दी तरफा स्थाई स्पीकर चुनेआ जाग। मुबारक गुल होरें कल विधानसभा परिसर दा दौरा लाइयै सोमवारें आयोजित होने आहले कार्यक्रम दिएं तैआरिणं दा जायजा लैता। उनें असैंबली हाल ते बैठक हाल सने मुखमंत्री, स्पीकर, उपमुखमंत्री ते दुए मंत्रिणं दे चैंबरें दा बी दौरा लाया। उनें तैआरिणं पर तसल्ली जताई ते अमले गी पूरी मेहनत मशक्कत कन्नै कम्म करने दी हिदायत दिती।

<><><><><><>

### Baramulla-Encounter

कश्मीर घाटी च सुरक्षाबलें ते आतंकियें बश्कार टाकरा भखे दा ऐ। उत्तरी कश्मीर दे बारामूला जिले दे उड़ी इलाके च कब्जा रेखा पर सुरक्षाबलें शुबे आहली नक्लो हरकत दिक्खी जेदे मगरा टाकरा भखी पेआ। श्रीनगर स्थित चिनार कोर दी सोशल मीडिया पोस्ट मुजब सेना ते जम्मू-कश्मीर पुलिस नै इलाके च सांझा घुसपैठ रोधी अभियान चलाए दा हा। आतंकियें दे लब्बने पर बलें उनेंगी ललकारेआ जेदे परते च आतंकवादियें अन्नेवाह गोलीबारी शुरू करी दिती। सुरक्षाबलें बी एहदा बनकदा परता दिता। खीरी समाचार थ्होने तगर टाकरा जारी हा। इस सरबंधै च होर जानकारी गी बलगेआ जा'रदा ऐ।

<><><><><><>

### PM-Vishwakarma

पी.एम विश्वकर्मा योजना तैहत पंजीकृत कारीगरें आस्तै MSME विकास सुविधा आफिस जम्मू आस्सेआ गांधी नगर गोल मार्किट ग्राउंड जम्मू च 24 अक्तूबर शा लेइयै 29 अक्तूबर तगर इक्क नमैश ते बपार मेले दा सरिस्ता कीता जा'रदा ऐ। एह नमैश पी.एम विश्वकर्मा कारीगरें ताई बपार दे मौकें गी बदाने दे मकसद कन्नै आयोजित

कीती जारदी ऐ। इत्थें स्टाल मुफ्त उपलब्ध करोआए जा'रदे ना। 2 जनें ताई 3 दिनें दा रौहने-बौहने, माल ढोने सने होर खर्चे दी वापसी दा प्रावधान होग। एहदे अलावा फ्ही कारीगर गी 500 रुपें हर ध्याड़ी दे स्हाब कन्नै पैसे बी दित्ते जाडन। नमैश च हिस्सा लैने आहले 22 अक्तूबर तगर आनलाइन तरीके कन्नै अपना पंजीकरण करोआई सकदे ना।

<><><><><><>

## Karva-Chauth

देसै दे होरनें हिस्सें आंगर टकोहदा करियै उत्तरी भारत दे हिस्सें च अज्ज हिंदू महिलाएं आस्सेआ करवा चौथ धार्मिक उत्साह ते जोश जब्बे कन्नै मनाया जा करदा ऐ। जम्मू च बी महिलां अपने घरे आहले दी लम्मी उम्र ते सुरक्षा आस्तै सूरज उदय होने थमां लेइयै चन्न दे औने तगर करवा चौथ दा व्रत रखदियां ना। एह त्यौहार हिंदू महिलाएं आस्तै सब्बनें शा बड्डा त्यौहार ऐ। करवा अखर दा मतलब ऐ पानी कन्नै भरोचे दा मिट्टी दा भांडा ते चौथ दा मतलब ऐ चौथा जेडा दस्सदा ऐ जे करवा चौथ हिंदू कलंडर मताबक कत्तक म्हीने च पूर्णमाशी परैंत चौथे ध्याड़े मनाया जंदा ऐ। व्रत दी शुरूआत बड्डुलै मुंह न्हेरे सूरज दे औने शा पैहले-पैहले सरगी खाने कन्नै होंदी ऐ ते औदे परैंत सारा दिन विजन पानी ते खाने दे रातीं चन्न गी अरघ देने परैंत महिलां अपने घरे आहलें कन्नै व्रत खोलदियां ना। एहदे शा पैहले संझा लै महिलां तैयार होइयै किट्टे दायरे च बेइये कथा कन्नै पूजा बी करदिआं न जेदा इस व्रत च टकोहदा महत्व ऐ।

<><><><><><>

## LG-Development

उपराज्यपाल मनोज सिन्हा होरें अज्ज आखेआ ऐ जे पिछले किश बरें दौरान जम्मू-कश्मीर च सैलानियें दी आमद च बाद्दा इत्थें अमन, रमानदारी, तरक्की ते खुशहाली दा सबूत ऐ। एल.जी होरें एह गल्ल जम्मू-कश्मीर च पहली बारी आयोजित कश्मीर मैराथन दे विजेताएं गी सम्मानित करदे होई आक्खी। उनें आखेआ जे इस बड्डे आयोजन नै

जम्मू-कश्मीर गी दुनिया दे मैराथन खाके पर खड़ा करी दित्ता ऐ। इस मौके गी जम्मू-कश्मीर ताई इक्क ऐतिहासिक पल दस्सदे होई श्री सिन्हा होरें जम्मू-कश्मीर च पूरे बदलाव लेई प्रधानमंत्री नरेंद्र मोदी हुंदा आभार व्यक्त कीता जिंदे करियै इस चाल्ली दे अंतरराष्ट्री आयोजन इत्थें मुमकन होई सकै। उनें आखेआ जे प्रधानमंत्री हुंदी फैसलाकुन नुमायंदगी ते जम्मू-कश्मीर च अमन, रमानदारी दी बहाली नै एहू यकीनी बनाया ऐ जे इत्थें लोक अंतरराष्ट्रीय क्रिकेट मैचें, फार्मूला-4 रेस सने जी-20 खिशर सम्मेलन ते अंतरराष्ट्रीय योग दिवस ज्नेय आयोजनें दी मेजबानी करियै मान महसूस करी सकन। उनें गलाया जे अपनी बेहतरी आबोहवा, समृद्ध सांस्कृतिक विरासत, मेजबानी ते कुदरती खूबसूरती कन्नै जम्मू-कश्मीर अंतरराष्ट्रीय खेडू आयोजनें ताई इक्क पसंदीदा थाहरै दे तौरा पर उभरा करदा ऐ। उनें आखेआ जे भविक्ख च श्रीनगर ते जम्मू च आयोजित होने आहलियां द्रौड़ प्रतियोगितां दुनिया भर दे एथलीटें गी कन्नै लेयांगन ते सैलसफे गी बढ़ावा थ्होग।

<><><><><><>

### Omar-Marathon

मुख्यमंत्री उमर अब्दुल्ला होरें मेद प्रगट कीती ऐ जे अज्ज करोआई गेदी “कश्मीर मैराथन’6 द्रौड़ इक्क सलाना आयोजन बनोग ते दुनिया दिएं मशहूर ते प्रमुख्य मैराथन द्रौड़ें च एहदा शुमार होग। मुख्यमंत्री होरें एहू गल्ल अज्ज बडुलै श्रीनगर दे पोलो व्यू इलाके थमां 21 किलोमीटर लम्मी हॉफ मैराथन द्रौड़ मुकम्मल करने दे बाद आखेआ जे जिसी उनें गै झंडी दस्सिए रवाना कीता हा। अपने संबोधनै च मुख्यमंत्री होरें सब्बनें प्रतिभागिएं गी ममारकबाद दित्ती जिनें अपनी द्रौड़ मुकम्मल कीती। उनें आखेआ जे उनेंगी मेद गै नेई ही जे ओहू इन्नी लम्मी द्रौड़ मुकम्मल करी सकंगन कीजे ओहू अजे तोड़ी कदे बी 12, 13 किलोमीटर कोला मता नेई द्रौड़े दे पर सब्बनें प्रतिभागिएं दे कन्नै द्रौड़दे होई उंदा बी दिल बदेआ ते ओहू एहू पैंडा तैह करी सके। मुख्यमंत्री होर इस आयोजन गी कामयाब बनाने च सहयोग देने आले सब्बनें लोकें, आयोजकें ते संगठनें दा आभारत प्रगट कीता। इस द्रौड़ च हिस्सा लैने लेई फिल्म अभिनेता सुनील शेटी बी आए दे हे ते मुल्खे दे बक्ख-बक्ख हिस्सें ते बाहरलें मुल्खे थमां

आए दे कई लोकें बी एहदे च शिरकत कीती। मुख्य भरै थमां 1700 कोला मते लोकें, जिंदे च किश विदेशी नागरिक बी ऐ हे, नै 42 किलोमीटर फुल्ल ते 21 किलोमीटर हॉफ मैराथन द्रौड़ च शिरकत कीती।

<><><><><><>

### RTI-Dr jatinder Singh

भारत दे मुख् सूचना आयुक्त हीरालाल समारिया होरें कल कार्मिक ते सिखलाई मैहकमा DOPT दे प्रभारी मंत्री डाक्टर जतिंद्र सिंह हुंदे कन्नै मलाटी कीती। बैठक दौरान समारिया होरें मंत्री होरें गी दस्सेआ जे केंद्री सूचना आयोग नै चालू माली बरे दे पैहले 6 म्हीने दौरान आर.टी.आई दे नबेडे दा रिकार्ड 100 फीसदी दर हासल कीती ऐ। डॉक्टर सिंह होरें इस उपलब्धि ताई केंद्री सूचना आयोग दी सराहना कीती। मुख् सूचना आयुक्त होरें अगगे दस्सेआ जे हुन आरटीआई आवेदन, मोबाइल ऐप दी मदाद कन्नै बी दाखल कीते जाई सकंगन। केंद्री मंत्री होरें आखेआ जे मोदी सरकार दे दौरान गै आरटीआई आवेदनें दी ई-फिलिंग ताई दिनें या रातीं कुसै बी समें देश या विदेश दे कुसै बी हिस्से थमां 24 घंटे दी पोर्टल सेवा रम्भ कीती गई ही।

<><><><><><>

### Paddy-Cleaning

जम्मू दे जिला मैजिस्ट्रेट सचिन कुमार वैश्य होरें मुंजी दी छटाई आस्तै भाहू तय करने दे सरबंध्यै च इक हुकम जारी करदे होई चालू खरीफ सीजन 2024 लेई मुंजी दी छटाई दा भाहू 50 रपे फ्ही क्विंटल तय कीता ऐ। एहू फैसला लैता गेआ जे मुंजी दी छटाई लेई मंडी दे ठेकेदार 50 रपे फ्ही क्विंटल साबै पैहे वसूल करडन। हुकम च सख्त निर्देश दित्ते गेन जे एहदे शा बद् कोई बी ठेकेदार पैसे नेई लेई सकदा। इस बरे आम मुंजी दा एमएसपी 2300 रपे फ्ही क्विंटल ग्रेड-ए मुंजी ताई 2320 रपे फ्ही क्विंटल ऐ जेडा भारत सरकार पास्सेआ तय कीता गेआ ऐ।

<><><><><><>

### Traffic-Ramban

राश्ट्रीय जरनैली सड़क ट्रैफिक पुलस रामबन नै एसएसपी रोहित बसकोत्रा हुंदी सरपरस्ती च ट्रैफिक नियमें दी खलाफवर्जी करने आहलें खलाफ इक्क बड्डी मुहिम चलाई ते प्रेशर हार्न इस्तेमाल करने आहले 68 गड्डी आहलें खलाफ मामले दर्ज कीते गए। मांच टीम नै दोषी डरैवरें पर 6 लक्ख 80 ज्हार रपे दा जर्माना बी लाया। इस विशेष मुहिम दा मकसद गड्डिं चा प्रेशर हार्न हटाना हा जिंदे कारण जरनैली सड़कें पर चलने आहली गड्डिं दे हार्न करी आम जनता, बुजुर्गे ते स्कूल जाने आहले बच्चें गी बी परेशानी होंदी ऐ। पुलसै लोकें लेई ट्रैफिक हेल्पलाइन नंबर बी जारी कीते न जिंदे पर ओहू ट्रैफिक नियमें दी खलाफवर्जी बारै शकैत करी सकदे न। नंबर न 9419993745 ते 9906023617 ते टोल फ्री नंबर 18001807043...

<><><><><><>

### Hockey-Team

हाँकी इंडिया नै नमीं दिल्ली च मौजूदा विश्व चैंपियन जर्मनी खलाफ औंदी दपक्खी श्रृंखला ताई 22 मिम्बरी टीम दा ऐलान कीता ऐ। भारतीय टीम दी कप्तानी हरमनप्रीत सिंह करंगन जिल्ले के उपकप्तान विवेक सागर प्रसाद होंगन। दऊं मैचें दी श्रृंखला 23 ते 24 अक्तूबर गी मेजर ध्यानचंद नेशनल स्टेडियम च खेड्डी जाग। एहदे शा पैहले चीन दे हुलुनबुइर च एशियाई चैंपियन्स ट्राफी च भारतीय टीम नै अपना खताब बरकरार रक्खेआ हा। 2011 च एहदे शुरूआत मगरा एहू मन्नी-परमन्नी दी प्रतियोगिता 5 बारी जित्ते आहली भारत दी हाकी टीम इक्कली एशियाई टीम बनी गई ही। खेड्ढे जाने आहली दपक्खी हाकी श्रृंखला राश्ट्री राजधानी च अंतरराश्ट्री हाकी दी वापसी दा प्रतीक ऐ।

<><><><><><>